

Dithero tsa Tirelano mo Kutlwanong

05/2014 Thero ka moletlo wa go gopola botsalo jwa Morena, e le ka 25. 12. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 51 - 51/48
2. **Thapelo:** Morena, Modimo, Rara yo o mo legodimong, re go leboga ka ntlha ya bopelonomi le bopelotlhomogi jo bogolo jwa gago jwa go re romela Morwao mo lefatsheng gore re mo tsalelwe, e nne motho ka ntlha ya rona. Ke gona re go kopang, re re: O re sedimoseitse dipelo tsa rona ka Mowa o o Boitshepo wa gago gore re nne re go leboge ka metlha ka ntlha ya bopelotlhomogi jo bogolo jo jwa gago, re gomotsege ka jona mo ditlalelong tsotlhe le mo dithaelong tsotlhe. Re kopa jalo ka ntlha ya ga Morwao Jesu Keresete, Morena, Morepholosi, yo o tshelang, a busa mmogo le wena le Mowa o o Boitshepo go tswa bosenangtshimologo, go ya bosenangbokhutlo. Amen.
3. Epistolo ka fa thulaganyong ya 2 e kwadilwe mo go Tito 3:4-7;
Efangele ka fa thulaganyong ya 1 e kwadilwe mo go Luka 2:1-20.
4. A go ipolelwe tumelo ya bokeresete!
5. Sefela sa 53 - 53/56
6. Thapelo ya mmadi wa thero.
7. **Epistola** ka fa thulaganyong ya 6 e kwadilwe mo go Bagalata 4:4-7, e re: "Mme ya re sebaka se e leng sona se sena go tla, Modimo wa roma Morwaa-ona, a belegwa ke mosadi, a nna fa tlase ga molao gore a rekolole ba ba laolwang ke molao, mme re tle re amogele bongwana. Mme e re ka lo le bana, Modimo o rometse Mowa wa Morwaa-ona mo dipelong tsa rona o o bitsang o re: 'Abba, Rara!' Jaanong ga o tshole o le motlhanka, o ngwana; mme fa o le ngwana, o morua-boswa wa Modimo ka Keresete." Amen.
8. **Thero:** Ditsala tsa Morena le Mopholosi wa rona Jesu Keresete! Boitumelo jwa moletlo wa go gopola botsalo jwa ga Keresete, a bo nne le lona lotlhe, mmogo le kagiso ya Modimo le Mopholosi wa rona jaanong le ka bosakhutleng!

Ya re sebaka se e leng sona se sena go tla, le bagaetsho botlhe ba tšile mo gae. Dibenkele di tswetswe, le dikgwebe tsotlhe di a ikhutsa. Diholide di gorogile. Re ja Keresemose mmogo le batho botlhe. Moletlo o mogolo o wa kereke o jewa ke botlhe, bahumi le bahumanegi, bagolo le bašwa, badumedi le ba ba sa dumeleng mo mafatsheng otlhe, le fa bontsi bo sa o tšaloganye gore ke wa eng, mme rona re a itse. Tota, a re a itse? Re a itse gore boitumelo jwa moletlo oo bo kopanya ba mo legodimong le ba mo lefatsheng, gonne yo o kileng a tla mo lefatsheng ka Keresemose ke Morena le wa magodimo otlhe. Fela jalo le rona re kopana mo moletlong wa lefatshe lotlhe, re opela mmogo le bona ba legodimo, re re: A tlotlo e nne ya Modimo mo legodimong, le go mo lebogela bopetlotlhomogi jwa ona!

Go keteka jalo go setse go simologile, fa Modimo o ne o atlhola, wa re: Ya re sebaka se e leng sona se sena go tla, Modimo wa roma Morwaa-ona, dinyaga tsa go leta di fetile, dingwakgolo, le dikete tsa dinyaga, tsotlhe di fetile. Sebaka se e leng sona se gorogile. Ga go na sepe se se tla tshwanang le tse di neng di le teng pele. Modimo o setse o dirafaditse ditsholofetso tse di solofeditšweng batho ba bogologolo. Tse di solofeditšweng mo tšimologong di diragetse. Yo o neng a solofediwa gore o tla tla go pholosa, go golola, go fodisa, le go busetsa bana mo gae mo Modimong, o gorogile. Botsalo jwa gagwe bo fetotse mokgwa wa go bala dinyaga. Ka botsalo jwa gagwe ga simologa gore dinyaga di balwe gore go supuwe, fa sengwe se diragetse, gongwe go ise go tsalwe, gongwe go sena go tsalwa morwa lekgarebe, Morwa Modimo ka botsalo jwa gagwe kwa Bethlehem. Mo bosigong yole moengele o boleletse badisa, a re: "Gompiano lo tsaletšwe Mogolodi mo motseng wa ga Dafita, yo e leng Keresete Morena." Badisa ba phatlaeditse molaetsa wa gore Mesia o gorogile. Simeone yo o ikanyegileng a tumisa Modimo mo tempeleng, a re: Mong-wa-thata-yotlhe o etleeditse pholoso ya gagwe mo matlhong a merafe yotlhe." Sagaria a tumisa, a re: "A go bakwe Morena, Modimo wa Iseraele; gonne o lekotse morafe wa ona, wa o direla kgololo. O re emiseditse lonaka lwa pholoso mo ntlong ya ga Dafita, motlhanka wa ona."

Ka dinyaga tsotlhe Modimo wa botshelo o ne a tshegetsa tšholofelo ka metlha sešwa ka ditsholofetso tsa gore o tla roma yo o tla tšhwetlang tlhogo ya noga ya bogologolo, le go nna Modisa yo o molemo wa bone yo o tla ba bothisa mo mafulong a matalana, le go ba gogela kwa metsing a tapoloso. Modimo wa leka ka thata e kgolo go boloka tumelo fa gare ga batho ba ona mo lefatsheng. Ka moo o ne wa romela merafe banna le bomme ba ba ikanyegileng mo dinyageng tse dikgolo, le tsa dikete, jaaka Nowa, le borralosika boAborahame, Isaka, le Jakobe, le bahumagadi ba bone jaaka Sara, Rebeka, le Ragele, banna ba ba ikanyegileng jaaka Josefa,

Jona, le Daniele, le baporofeti ba bagolo, le ba bannye jaaka Moše, Jesaya, Miga, le Sagaia, rraagwe Johane mokolobetsi, baperesiti le baatlhodi, dikgosi, le balemi, jaaka Arone, Samsone, Dafita, Amose, botlhe ba ne ba supa yo o neng a tla tla, le go diragatsa ditsholofetso tse di molemo go nna basupi ba gore Modimo o ne a sa lebale batho ba ona, le go tiisa ka metlha gore go tla tla yo o tla itshwarelang, le go golola, le go rekolola, le go fodisa, le go itshepisa botlhe ka go tlosa bosula jotle jwa nako e e neng e fetile ya bogologolo ka kgololo, pholoso e e sa khutleng, le ka kagiso le tshiamo.

Go ne go le bokete go boloka tsholofelo eo gore e nnele ruri mo dinyageng tse dikgolo, ya re morwalela o sena go feta, le sebaka sa botlhanka kwa Egepeto, ka dinyaga tse dintsi mo sekakeng, ditlalelo tsa mauba, tsa dintwa, le mo dipogisong tsa mefutafuta. Dipaka tsotlhe tseo tsa leka go tima tsholofelo ya gore Modimo o tla fetola bosula jotle gore tsotlhe di nne molemo ka go roma Mesia, Mogolodi, Mopholosi, Mothusi, Ngaka ya nnete, Modisa yo o molemo wa batho ba ona. Tsholofelo eo ya nnete, ya botshelo e ne e le mo kotsing ya go tingwa, fa batho ba ne ba leka go batla thuso go gongwe, ba sa tlhole ba batla thuso ya Modimo o o Borarobongwe, o e leng Rara le Morwa le Mowa o o Boitshepo, ba sa tlhole ba itschenkela thuso mo go ona, le fa e le mo dikgannyeng tsa tiro ya bone, gongwe mo dikgannyeng tsa motse wa ga gaabo, gongwe tsa losika. Ba leka tota go lebelela thuso mo medimomakong, mo dikakanyong tsa baditšhaba, gongwe mo ditlhabelong tsa badimo, ba gopola gore ka go latela tseo tsa baheitane ba tla bona botshelo, le ditshegofatso. Tota-tota go ne go le thuso ya go itsietsa, e le tlolo ya taolo ya ntlha. Go ne go le tshenyego ya tumelo ya nnete, le tsholofelo fa gare ga Baiseraele, ba fapaana mo ditseleng tsa Modimo tse e leng tsa botshelo, tse di itshekisitsweng ka molao le thato ya Modimo. Le fa go ntse jalo, ditsela tseo tsa diphapogo e ne e le tse di tlwaelegileng mo go bone, go tloga mo go Atame, fa ba ne ba simolola go belaela molemo wa Modimo, le go latlhegelwa ke tumelo ya nnete, ka go latela dithaelo tsa ga Satane, ka go ikgaoganya le Modimo, ka go dumela ditsela tsa ditimetso tsa go dira ka fa thatong ya batho, ka go fapoga mo tseleng ya Modimo. Diphetogo tseo tsa thaisa batho sešwa ka botlhanka jo bo maswe, ba sa bone kgololesego ka fa ditsholofetsong tsa ga Satane, mme ba bofiwa ka melawana, ka go busiwa ke bolelo, loso le Satane. Ba ne ba fetoga go nna batlhanka ka go bofiwa ka go sa utlwe Modimo, ba kgaogangwa le Motlhodi wa bone ka go bofiwa ke bosula jo bontsi. Jalo ba latlhegetswe ke kgololesego ya tshimo ya Edene, ba sa tlhole ba le baruaboswa jwa legodimo, ba kojwa mo parateiseng, le mo bontleng jwa go tshela le Modimo, ba le batlhanka ba bolelo, ba bogisiwa ke ditlalelo tsa go nna kgakala le legae, ba bogisiwa ke dikeletso tsa go eleletsa pholoso, ba tlhoka kagiso, ba kobilwe mo magaeng a bone. Ditlalelo

tsotlhe tseo tsa ba wela ka ntlha ya go sa utlwe, le e seng go tshegetsa ditaolo tsa Modimo, e le botlhanka jo bo tthagileng ka boleo jwa tlhago, jaaka go kwadilwe mo go Genesi 3:17-19 gore "A raya Atame a re: E re ka o utlwile lentswe la moasdi wa gago, wa ja setlhare se ke go laetseng ka re: 'O se ka wa se ja!' masimo a hutsitswe ka ntlha ya gago. O tla ja tsa ona ka matsapa ka malatsi otlhe a botshelo jwa gago. A tla go tlogela mitlwa le ngwang; o tla ja merogo wa naga. O tla ja dijo ka mofufutso wa sefatlhego sa gago go fitlhelela o boela kwa mmung, gonne o nthitswe mo go ona; o lerole, mme o tla boela leroleng."

Le fa go ntse jalo, go tswa mo tshimologong Modimo

o bolokile le tsholofetso ya kgololo ka bopelotlhomogi jwa ona. E ne e le maikaelelo a ona a a gakgamatsang, go tloga mo tshimologong ya hisitori ya batho, le fa go ne go sa letelwe. Loso ke tuelo e re tshwanetseng go duelwa ka yona. Mme mo boemong jwa bosula jwa loso Modimo o re baakanyeditse tsholofelo ya botshelo. Ka bopelotlhomogi jwa ona o re baakanyeditse boitshwarelo, le go re bulela tsholofelo ya go tshela le ona. Le fa molao o emalalana le rona, le go re sekisa ka metlha, gonne maleo a rona a tima tshiamelo ya botshelo, Modimo o bonye tsela e ntšhwa gore lotlhaka lwa molao lo diragadiwe ka kgakgamatso e kgolo. Go diragetse, ya re sebaka se sena go tla, e re batho ba letile sebaka se seleele gore go diragale. Jesu o ne a sa tlogele sepe se se neng sa tshwanetse go dirwa ke ene gore thato ya ga Rraagwe e diragadiwe. Jesu o diragaditse tsotlhe ka botlalo go diragatsa thato ya ga Rraagwe, go tloga ka botsalo jwa gagwe kwa Bethlehem, go ya go diragaditswe tsotlhe ka loso lwa gagwe mo sefapaanong sa kwa Golegota. Ke nnete Keresete a diragatsa tsotlhe tse di solofeditsweng ke Rraagwe, a tshela a se na boleo, a tshela ka fa thatong ya ga Rraagwe, a mo utlwa, a utlwa molao wa Modimo ka botlalo, go tloga mo tshimologong ka dikakanyo, ka mafoko le ka ditiro tsa gagwe. Ka letsatsi la borobedi ngwana wa ga Maria o ne a rupiwa ka fa molaong. Ya re malatsi a phepafatso ya ga mmaagwe a sena go feta ka fa molaong, Jesu o ne a isiwa kwa tempeleng. Ka thupiso ya gagwe Jesu o ne a simolola go tsholola madi a gagwe gore re pholosiwe, e le madi a a nang le tlhwatlhwa e kgolo, e le madi a Modimo a a se nang molato, a sa kgotlelediwa ke dikeletso tse di maswe, e le madi a a boitshepo. Ke ona a o a tshologeletsweng, e bile a tshologeletswe boitshwarelo jwa maleo otlhe a gago. Ke ona a a dirileng gore re gololwe mo melatong yotlhe ya rona. Ke tsela e Jesu o re lefetsang thuananyo ya maleo a rona ka yona, e se ya maleo a rona fela, mme e bile ke ya maleo a lefatshe lotlhe. Ke tetlano e rotlhe re e baakanyeditsweng ka thuananyo e e duetsweng ke Jesu. Jalo ga re tlhole re le baeng le bajaki, mme re ba morafe mmogo le baitshepi, re ba ntlo ya Modimo, ga re tlhole re le batlhanka, mme re bana ba

Modimo, re ba losika lwa Modimo. Ke gona re nang le tshiamelo go kopa mo go ene mo ditlalelong tsotlhe tsa rona gore o re thuse, le fa re tshela jang, re kaelwa go rapela, re re: Abba, Rara yo o rategang, o re utlwe, o utlwe dithapelo tsa rona. O re solofeditse gore o tla re utlwa, pele re ise re mo kope, ga twe: Ona o nonofile go dira bogolo go feta tsotlhe tse re ka di kopang, le tse re ka di gopolang. Ke yona tshiamelo ya rona. Re dumelelwa go isa tsotlhe tse di re tshwenyang mo Modimo mo dithapelong tsa rona.

Ke nnete, ka Keresemose re na le boikhutso jo bo molemo. Re na le nako le phatlha go dira moletlo wa go gopola kgololo ya Modimo e batho ba ona ba golotsweng ka yona ke Jesu Keresete, Morena wa rona. Re a mo rapela, le go mo galaletsa ka ntlha ya kgololo eo, gape re a kopa gore a re bolokele mo tumelong ya boammaaruri kajeno le mo malatsing otlhe. A a re femele gore re se ka ra latlhegelwa ke tumelo ka go batla thuso go gongwe. Go botoka gore a gogele ditsebe le dipelo tsa rona mo Lefokong la ga Morwaaona, Jesu Keresete yo e leng Morena le Mopholosi wa rona ka tiro ya Mowa o o Boitshepo gore re latele ditsela tsa ga Jesu tsa go tshela mo kutlong e e ikanyegileng, re mo utlwe ka metlha, le go dumela ditsholofetso tsa gagwe ka bopelotlhomogi jaanong le ka bosakhtuleng. Amen.

Ke tsona tse re di diretsweng ke Modimo ka go re abela Morwaaona. Ka moo, itumeleng, lo opele tumiso ka mantswe a a sa tsholeng a didimala, le fa e le leng. Haleluja!

9. Thapelo: Modimo o o bopelonomi, Mong-wa-thata-yotlhe, Rara yo o kutlwelobotlhoko, a sefatlhego sa gago se re phatsimisetse, se re tiise mo kitsong ya bopelotlhomogi jwa gago jo o bo re senoletseng ka Morwao yo o rategang gore re tukisiwe mo loratong, re baakanyediwe go go boka mmogo le mephato yotlhe ya legodimo, re go galaletse ka mafoko le ka ditiro tsa rona ka Jesu Keresete, Morena, Morepholosi. Amen.

Thapelo ya Morena: Rara wa rona yo o mo legodimong ...

10. Sefela sa 55 - 55/59

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2013.

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.